

iste ternarius habet in se primam perfectionem; quoniam primus numerus est, qui constat ex omnibus partibus suis, scilicet unitate et dualitate, quae simul iunctae faciunt tria... Item summa perfectio est in eo, quia unitas, quae est principium et completio omnis numeri, reflexa supra se reduplicatione perfecta quadrata, qualis in solido quadrato triplicatur secundum rationem, remanens una secundum unitatem; ut si dicatur semel unum, semel... Similiter, si consideretur numerus iste in quantitate continua, habet in se primam perfectionem, et summam. Primam, quia omnis quantitas habet principium, medium, et ultimum. Summam, quia perfectio quantitatis continuae suprema consistit in trina dimensione, scilicet longitudine, latitudine, et altitudine; et hoc est, quod dicit Philosophus in principio *de coelo et mundo*. Omne enim perfectum in tribus dicimus, et hoc numero adhibuimus nosmetipsos magnificare Deum unum creatorum omnium, eminentem proprietatibus eorum, quae sunt creata. Similiter, si consideretur iste numerus in creatura, habet in se primam perfectionem, et summam. Primam, quia trinitatem vestigii contingit reperire in qualibet creatura, quantumcumque parva, quantumcumque minima. Perfectam, quia secundum trinitatem imaginis reformatam, et Dei formam attenditur summa et nobilissima perfectio creaturae, scilicet beatitudo¹ ».

U

DISTINCTIONES

I. UBI CIRCUMSCRIPTIVUM — UBI DEFINITIVUM².

II. UNIO — COMPOSITIO. « Unio, ait s. Bonaventura, dicit compositionem duorum in tertio, sive constituantur ad constitutionem tertii, sive non. Compositio vero dicit coniunctionem aliquorum, ita quod veniunt ad constitutionem tertii; et omne tale aliquo modo est materiale respectu alterius. Et ideo compositio semper dicit imperfectionem in componentibus, unio vero non ». Exinde

¹ In lib. I Sent., Dist. II, a. I, q. 4 resol.

² Vid. *Circumscriptive — Definitive*, p. 64.

infert sanctus Doctor Naturam Divinam non posse alteri componi, sed posse alteri uniri¹.

III. UNITAS QUANTITATIVA — TRANSCENDENTALIS. *Unitas transcendentalis*, vel *metaphysica* est *indivisio rei in se*, et a quovis alio *divisio*. Huiusmodi unum convertitur cum ente²; si enim ens in plura divideretur, non esset amplius ens, sed multa entia. « Unum, ad rem ait s. Thomas, non addit supra ens, nisi negationem divisionis, non quod significet ipsam indivisionem tantum, sed substantiam eius cum ipsa; est enim unum idem quod ens indivisum³ ». Nempe *unitas* primario significat entitatem rei, secundario negationem divisionis. E. g., « unum dictum de homine significat naturam, vel substantiam hominis non divisam⁴ ». Ex quibus patet unitatem *transcendentalem* opponi multitudini, per modum privationis ut *indivisum divisor*⁵; ubi enim est unum, non est multitudo, et ubi sunt multa, non est unum. Haec multitudo, cui opponitur *unitas transcendentalis*, dicitur *numerus transcendentalis*, qui quidem numerus non est aliquid distinctum ab ipsis entibus, sed consistit in ipsis entibus coniunctim sumptis: « Cum dicuntur res multae, multitudo sic accepta significat res illas cum indivisione circa unamquamque earum⁶ ». Quare haec multitudo « nihil addit supra res multas, nisi distinctionem, quae in hoc attenditur, quod una earum non est alia; quod quidem non habent ex aliquo superaddito, sed ex propriis formis⁷ ». Unde vocatur etiam *multitudo intrinseca*⁸. *Unitas autem quantitativa* est aliquid, quod oritur in quantitate ex unione partium ipsius; ita ut, ubi quantitatis partes invicem uniuntur, faciant unum; sin dividantur, faciant plures unitates, seu *numerum quantitativum*; siquidem hic « fit per divisionem continuo⁹ ». E. g., si partes baculi sunt unitae, est unitas in baculo; sin dividantur, oriuntur plures unitates¹⁰, et fit nu-

¹ In lib. III Sent., Dist. I, a. 1, q. I ad arg.

² « Nihil est esse, quam unum esse »; s. Aug., *De mor. Manich.*, lib. II, c. 6, n. 8.

³ I, q. XI, a. 1 c., et Qq. *dispp.*, *de Pot.*, q. IX, a. 7 c.

⁴ I, q. XXX, a. 3 c.—⁵ I, q. XI, a. 2 c.

⁶ I, q. XXX, a. 3 c.

⁷ Qq. *dispp.*, *de Pot.*, q. IX, a. 7 c.

⁸ Ibid., q. III, a. 16 ad 3.—⁹ Ibid.

¹⁰ Vid. *Multitudo constitutur ex unitatibus*, p. 216.

merus quantitativus, qui quidem numerus ponit quoddam accidens additum supra ens¹. Quocirca unitas quantitativa opponitur multitudini, seu numero, ut mensura mensurato. Unde numerus definitur, multitudo mensurata per unum².

Hisce theoriis utitur sanctus Doctor, ut ostendat in *Divinis* non praedicari « unum et multa, quae pertinent ad genus quantitatis; sed unum, quod convertitur cum ente, et multitudo ei correspondens³ ».

IV. UNITAS SIMPLICITATIS — COMPOSITIONIS. Si ens est indivisum non modo *actu*, sed *potentia*, dicitur unum unitate *simplicitatis*; et, prout magis, vel minus ad actum accedit, est magis, vel minus simplex unum. Hinc Deus, qui est actus purissimus, maxime unus, simplicissimusque est: « Illud, in quo nulla est compositio partium, nulla dimensionis continuitas, nulla accidentium varietas, nulli inhaerens, summe et vere unum est. Et inde est, quod sua unitas est principium omnis unitatis, quia illud, quod est maximum, est principium in quolibet genere, sicut maxime calidum omnis calidi⁴ ». Si vero ens *actu* quidem est indivisum, sed tamen *potentia* est divisibile, dicitur unum unitate *compositionis*; veluti homo, qui unus est, constat tamen ex anima, et corpore. Quia vero ipsum ens compositum non existit, quamdiu componentia sunt divisa, existit vero, cum uniuntur; perspicuum est esse cuiuslibet rei in *indivisione* consistere⁵, et unumquodque ita custodiare unitatem, sicut custodit suum esse⁶.

V. UNITAS PER SE — PER ACCIDENS. Si ens vel omnis compositionis est expers; vel componentia sunt substantialia, et se habent, ut actus et potentia, veluti anima et corpus, vel eadem componentia unicam subsistentiam habent, quemadmodum evenit in Christo⁷, ens est unum

¹ I, q. XXX, a. 3 c. — ² I, q. XI, loc. cit.

³ *De Pot.*, q. IX, a. 7 c.

⁴ *In lib. I Sent.*, Dist. XXIV, q. I, a. 1 sol.

⁵ I, q. XI, a. 1 c. « Quae non sunt simplicia, concordia partium imitantur unitatem, et in tantum sunt, in quantum eam assequuntur »; s. Aug. *De mor. Man.*, lib. II, c. 6, n. 8. Et alibi, *De vera Relig.*, c. 34: « Nec corpus ipsum esset, nisi unum esset ».

⁶ Vid. p. 57.

⁷ Vid. s. Thom., 3, q. II, a. 4 c., et *Qq. dispp.*, q. de *Unione Verbi Incarnati*, a. 3 c.

per se. Si autem componentia substantialia non se habeant ut actus, et potentia, habeantque distinctam existentiam, ut unus acervus lapidum, unus populus, una civitas, unus grex etc.; vel compositio non sit in linea substantiali, sicut est compositio ex subiecto et accidentibus, ens dicitur unum *per accidens*¹. Unitas *per se* a s. Bonaventura constitutiva, unitas *per accidens* collectiva nuncupatur².

VI. UNITAS GENERICA — SPECIFICA — NUMERICA. Cum unum significet *ens indivisum*, tot erunt unitates, quot sunt divisiones. Iam vero res praecipue dividuntur ad invicem vel *genere*, ut lapis ab homine; vel *specie*, ut leo ab equo; vel *numero*, ut Petrus a Paulo. Igitur tres existunt unitates, quarum illa, quae negat divisionem generis, dicitur *generica*; quae negat divisionem speciei, dicitur *specifica*; quae negat divisionem numericam, dicitur *numerica*, seu *individualis*. Hinc sunt *unum genere* ea quae convenient in eadem ratione generica. *Specie*, ea quae in eadem definitione convenient. Ea, quae sunt *una genere*, vel *specie*, dicuntur etiam *formaliter una*, hoc est quoad essentiale conceptum. Denique singularia quaeque, sive individua sunt *unum numero*. Sola *unitas individualis* est realis unitas; nam singularia tantum in rerum natura existunt. Unitates autem *generica*, et *specifica*, nisi eis accedat *unitas individualis*, non sunt *a parte rei* perfectae unitates, sed solum negationes diversitatis. E. g., natura Petri et Pauli dicitur *una*, non quia ponit in utroque eamdem entitatem, sed tantum quia negat specificam diversitatem. Hinc s. Thomas: « Quae sunt indivisa respectu alicuius vel generis, vel speciei,... non dicuntur simpliciter unum; sed unum vel in genere, vel in specie...; et quod est simpliciter indivisum, est simpliciter unum, quod est unum numero³ ».

Porro, illud, quod unitatem *numericam* constituit, seu illud, per quod in eadem specie unum ab altero differt, vocatur *principium individuationis*. De hoc principio questione valde implexa penes Scholasticos versatur. Horum di-

¹ Vid. s. Thom., *In lib. V Met.*, lect. VII sqq.

² *In lib. III Sent.*, Dist. VI, a. II, q. 2 ad arg.

³ *In lib. I Sent.*, Dist. XXIV, q. I, a. 1 sol.

versas sententias, diversaque argumenta omittimus¹, ne ab huius opellae proposito deflectere videamur. Illud tantum innuimus, Thomistas omnes in hanc concurrere sententiam, substantiarum unitatem et multiplicationem numericam repetendam non esse ex forma: siquidem « differentia, quae a forma procedit, inducit diversitatem speciei² », sed a materia; atque rursus non ex materia communi et indeterminata, sed a materia *signata* quantitate³: hoc est cum ordine ad certas dimensiones, vel clarius ex materia affecta et divisa per quantitatem in diversas partes habentes diversum situm. Itaque forma determinat materiam communem ut sit haec vel illa species⁴; quo sensu dicitur: *Forma dat esse rei*⁵; materia autem *talis*, seu cum ordine ad certas dimensiones, efficit, ut forma individua sit, et incomunicabilis. Exinde haec duo inferunt: 1º Substantiae spirituales, quae ad coniunctionem sui cum corporibus naturaliter destinantur, nempe animae humanae, individuae sunt per ordinem ad corpora, ad quae destinantur; et quia etiam a corporibus separatae, ordinem dicunt ad eadem corpora, etiam separatae, remanent individuae. 2º Substantiae mere spirituales puta Angeli, cum neque in seipsis materiam habeant, neque ad coniunctionem sui cum materia destinantur, sunt seipsis individuae, et singulae differunt specie. Quapropter in qualibet specie Angelorum unus tantum numero Angelus est possibilis; fieri enim non potest, ut sint duea eiusdem speciei formae sine materia, e. g., duae albitudines⁶. Cum autem Deus summe simplex sit, et actus purissimus, est seipso maxime unus⁷; sive « *Divina Bonitas et Esse* individuatur ex ipsa sui puritate, per hoc scilicet, quod ipsa non est recepta in aliquo⁸ ».

VII. UNUM—ALIQUID. « Dicitur *aliquid* quasi aliud quid, unde sicut ens dicitur unum, in quantum est indivisum in se, ita dicitur *aliquid*, in quantum est ab aliis divisum⁹ ».

VIII. UNUM—UNICUM. *Unicum* dicitur id, praeter quod

¹ Vid. de his Sanseverino, *Elementa seu Instit. Phil. Christ.*, t. II, *Ontol.*, c. III, a. 2, p. 115 sqq, Neapoli 1873-1874.

² *Contr. Gent.*, lib. II, c. 93.—³ Vid. p. 199.

⁴ Vid. p. 129-130.—⁵ Vid. p. 142.—⁶ I, q. L, a. 4.

⁷ I, q. XI, a. 4.—⁸ In lib. *De Causis*, lect. IX.

⁹ Qq. *dispp.*, *De Ver.*, q. I, a. 1 c.

aliud similis essentiae non datur. Unde patet non omne unum esse *unicum*. Petrus, e.g., unus est homo, sed non *unicus*; plura quippe dantur similis essentiae supposita. Mundus est *unicus*, quamquam possint esse plures: Deus autem est natura absolute *unicus*, quia contradictionem implicat plures esse Deos.

IX. UNIVERSALE—COMMUNE. Universale, inquit s. Thomas, non est idem, quod commune; differunt enim, quia communis *quantum est de se*, non determinat, an id, quod communicatur pluribus, sit idem numero, vel non; sed universale hoc determinat, quia numquam universale est idem numero in pluribus. Quocirca in *Divinis* essentia potest dici communis, non autem universalis¹. « Essentia universalis non est eadem numero in suis inferioribus, sed secundum rationem tantum. Essentia autem Divina est eadem numero in pluribus personis² ».

X. UNIVERSALE COMPLEXUM — INCOMPLEXUM. *Universale complexum* est vel propositio universalis, ut, omne totum est manus sua parte; vel quicquid parit multiplicem conceptum in mente, ut definitio, puta animal ratione praeditum. *Universale autem incomplexum* est illud, quod unicum in mente parit conceptum, qui tamen recipere potest multa, cuiusmodi est natura humana, quae recipit omnia individua, de quibus praedicari potest.

XI. UNIVERSALE IN CAUSANDO — IN REPRAESENTANDO — IN SIGNIFICANDO — IN ESSENDO. *Universale in causando* appellatur illud, quod licet sit unum, tamen potest efficere multa. Hoc dicitur etiam *causa universalis*, quae nempe non est determinata ad unum *specie* effectum producendum, sed varios *specie* effectus producere potest³. *Universale in repreäsentando*, quod dicitur etiam *universale ad rem*, est unum multorum formas referens; ut idea artificis plures repreäsentans domos; vel « *formae rerum* in mente Angelica existentes⁴ ». *Universale in significando* est vel signum universale, ut omnis, nullus; vel vox multa divisim significans, sive *univoce*, ut vox homo, sive *aequivoco*, ut vox taurus etc. *Universale in essendo*, seu *in praedicando* est unum aptum inesse multis, seu unum a-

¹ In lib. I *Sent.*, Dist. XIX, q. IV, a. 2 ad 2.

² Ibid., sol.—³ Vid. p. 61.

⁴ In lib. II *Sent.*, Dist. III, q. III, a. 2 ad 1.

ptum praedicari de multis, puta natura humana. « Universale, inquit B. Alb. M., est quod, cum sit in uno, aptum natum est esse in pluribus. Et per hoc, quod in multis per aptitudinem est, praedicabile est de illis. Et sic universale est, quod de sua aptitudine est in multis, et de multis¹ ». Alii tamen *universale in essendo* ita interpretantur, ut ipsum aliud sit ab *universalis in praedicando*. Docent enim illud esse ideam Platonicam, ex cuius participatione singularia essentiam suam mutuari finguntur, ita ut separatim ab iis, in quibus est communis, existat. At falso; nam « quod est commune multis, non est aliud praeter multa, nisi sola ratione, sicut animal non est aliud praeter Socratem, Platonem, et alia animalia, nisi intellectu, qui apprehendit formam expoliatam ab omnibus individuantibus et specificantibus² ».

XII. UNIVERSALE METAPHYSICUM — LOGICUM. *Universale metaphysicum*, quod etiam *directum* appellatur, est unum abstractum a multis, seu natura sine individuis considerata. *Universale logicum*, seu *reflexum* est unum respiciens multa, idest unum comparatum ad plura, tamquam superius ad sua inferiora. Unde *universalitas logica* non quidem in abstractione a singularibus *formaliter* consistit, sed in eo quod illa natura abstracta pluribus attribui posse cognoscitur. De universalis *metaphysico* loquitur s. Thomas, ubi inquit: « Quod abstrahitur a materia individuali, est universale³ »; et de universalis *logico*, cum passim docet naturam fieri universalem, *per intentionem universalitatis*, quatenus nempe cognoscitur, ut *participabilis ab inferioribus*.

XIII. USUS — ELECTIO — CONSENSUS. Cum voluntas sit vel finis, vel mediorum⁴, tres enumerantur actus illius eliciti⁵ circa finem, scilicet volitio, intentio, fruitio, qui actus sunt iidem cum amore, desiderio et gaudio. *Gaudium*, seu *fruitio* versatur circa finem obtentum, seu circa bonum praesens; *desiderium*, seu *intentio* circa finem obtainendum, seu circa bonum absens; amor et volitio circa

¹ *De Praed.*, tract. II, c. I.

² *Contr. Gent.*, lib. I, c. 26, n. 4.

³ I, q. LXXXVI, a. 1 c.

⁴ Vid. s. Thom., 1^a 2^{ae}, q. VIII, a. 2.

⁵ Quinam sint actus eliciti, vid. p. 12.

finem, et bonum, abstrahendo ab eius absentia, vel praesentia. Quibus ex adverso respondent odium, timor, et tristitia circa malum. Tres item sunt actus voluntatis eliciti circa medium, scilicet *electio*, *consensus*, *usus*. *Electio*ne voluntas praefert, et amplectitur unum medium prae aliis; *consensu* approbat iudicium intellectus circa illud medium; *usu* applicat potentias ad executionem.

XIV. UT QUO — UT QUOD¹

XV. UT SIC — ABSOLUTE. 1^o *Ut sic* res spectari dicitur, quando consideratur sub certo respectu: vel secundum quaedam adjuncta². E. g., praemium essentiale, quod *aurea* dicitur, absolute est maius, quam praemium accidentale, quod dicitur *aureola*³; at quia *aureola* non cuilibet datur, sed tantummodo illis, qui sunt in statu perfectiōnis, ipsa ut *sic*, seu *quantum ad statum habentis* est maior⁴. Ita etiam *actus virtutis elicientis ipsum* iudicatur ex *se*, seu absolute bonus: ut *sic* autem, nempe ex *adiuncto*, potest esse malus; e. g., si fiat propter *pravum finem*, *ut dare eleemosynam propter vanitatem*; vel *cum murmure et impatientia*. Quo modo « deformat diabolus actum credendi, quia cum murmure, et impatientia, et displicentia illius, quod credit, movetur in actum illum; et ita credendo peccat, non quia credit, sed quia non eo modo, quo credere debet, credit⁵ ». 2^o Saepe indicat sensum *reduuplicativum*. E. g., homo *ut sic*, seu *quatenus homo*, est ratione *praeditus*⁶.

U

EFFATA

I. UBI NON EST TOTUM ET PARS, AUT TOTUM SUMITUR, AUT NIHIL. Hoc est: Ens simplex nullam agnoscit realem separationem partium; id quod evidens ex se est. Hinc quidquid de ipso enunciatur *a parte rei*, numquam de aliqua

¹ Vid. *Quo — Quod*, p. 293.

² Vid. *Absolute — Modaliter*, p. 4.

³ Quid significetur his vocibus, explicatum est p. 22.

⁴ Vid. s. Thom., *In lib. IV Sent.*, Dist. VIII, q. I, a 2, sol. 1 ad 2.

⁵ S. Bon., *In lib. II Sent.*, Dist. VII, pars 1, a. 1, q. II ad arg.

⁶ Vid. p. 313.

parte intelligi potest. Dicitur a *parte rei*, quia etiam in ente simplicissimo distinctio *rationis* admittitur. Potest etiam hoc effato illud significari, quod simplex aut totum cognoscitur, aut nihil: « Quidditates simplices vel totaliter non attinguntur, et nihil intelligimus de eis, vel cognoscuntur, ut sunt¹ ». Quare « in rebus simplicibus, in quarum diffinitionibus compositio intervenire non potest, non possumus decipi, sed deficimus in totaliter non attinendo² ». Seu « in simplicibus. . . quilibet error totaliter excludit cognitionem rei³ ». E. g., « quicumque errat circa Deum, non cognoscit Deum; sicut qui credit Deum esse corpus, nullo modo cognoscit Deum; sed apprehendit aliud loco Dei⁴ ».

II. UBI TERMINATUR OPERATIO PRIORIS POTENTIAE, IBI INCIPIT OPERATIO SEQUENTIS. E. g., « sensus terminatur ad imaginationem. . . et intellectus in termino imaginationis incipit, quia phantasmata accipit pro objeto⁵ ». Item, « ubi terminatur operatio intellectus, ibi incipit operatio affectus⁶ ».

III. UBI UNUM PROPTER ALTERUM, UTRIBIQUE UNUM⁷. « Hoc intelligitur, quando illud, propter quod aliquid participat aliquam proprietatem, est tota ratio illius participationis⁸ ». Ob hanc rationem Caro Christi unita Divinitati adoranda est adoratione latiae: « Sicut tenere equum et fraenum non est plus, quam equum, sic adorare Deum et carnem non est plus, quam adorare Deum⁹ ». Insuper, « hoc verum est, si sit ibi unum propter alterum, quod non queat separari; sed cum separatur, iam non remanet unum¹⁰ ». Ob hanc aliam rationem, « cum Caro Christi numquam est separata a Verbo, ideo semper consideranda est ut coniuncta, et semper adoranda est latria¹¹ ». E contrario, etsi proximus dili-

¹ I, q. LVIII, a. 3 c.

² Ibid., q. LXXXV, a. 6 c.

³ Cont. Gent., lib. III, c. 118, n. 3 — ⁴ Ibid.

⁵ In lib. III Sent., Dist. XXVIII, q. III, a. 1 sol.

⁶ Qq. dispp., De Ver., q. X, a. 11 ad 6. — ⁷ Vid. p. 302.

⁸ S. Bonav., In lib. II Sent., Dist. XL, a. 11, q. 4 ad arg.

⁹ In lib. III Sent., Dist. IX, dub. 3.

¹⁰ In lib. IV Sent., Dist. IX, a. I, q. 4 ad arg.

¹¹ In lib. III Sent., Dist. IX, a. I, q. 1 resol.

gatur propter Deum, tamen potest non esse unus actus, quo diligitur Deus, et proximus; « nam sic potest homo affici circa Deum, quod nihil cogitet de proximo; sic etiam potest affici circa proximum, quod tunc non afficiatur erga Deum¹ ». Denique « differt dicere unum propter alterum, et unum per alterum. Quia ubi est dicere unum per alterum, est ponere duo, quorum alterum est sicut efficiens, alterum sicut instrumentum; et non est verum quod efficiens possit tantum per se, quantum potest cum instrumento. Quod autem dicitur, ubi unum propter alterum, verum est, cum loquitur de unitate obiecti, ubi propter dicit uti causam formalem, ut video colorem, quia lucidum, et amo vinum, quia dulce² ».

IV. ULTIMA REI PERFECTIO EST EIUS OPERATIO. Distinguendum est duplex *ultimum rei*: « unum, quod est in re, et aliud, quod est extra rem; sicut in corporibus ultimum in corpore est superficies corporis contenti; ultimum extra est locus, qui est superficies corporis continentis³ ». Iam « ultimum cuiuslibet rei in seipsa est ipsa fei operatio, propter quam res est⁴ ». Nam « unumquaque in tantum perfectum est, in quantum est actu. Manifestum est autem, quod operatio est ultimus actus operantis; unde et actus secundus a Philosopho nominatur... Et inde est, quod res unaquaque dicitur esse propter suam operationem⁵ ».

V. ULTIMA PERFECTIO REI EST CONIUNGI SUO PRINCIPIO. Intelligitur de *ultimo quod est extra rem*: « Ultimum cuiuslibet rei extra seipsam est principium, a quo res habet esse ». Et sane, sicut res eo imperfectiores sunt, quo magis a suo principio distant, e. g., corruptibilia sunt imperfecta, *propter nimium distare a primo*; ita *complentur*, et *firmantur per coniunctionem ad suum principium*. Ex quo effato intelligitur Deum *habere rationem ultimi finis proficientis*⁶.

VI. UNIBILE OMNE EST PROPORTIONABILE. Quod a s. Bonaventura explicatur hunc in modum: « Dicendum, quod

¹ Ibid., Dist. XXVII, a. II, q. 3 ad arg.

² In lib. IV Sent., Dist. XXVIII, a. I, q. 4 ad arg.

³ S. Thom., In lib. IV Sent., Dist. VIII, q. I, a. 1, sol. 1 ad 1.

⁴ Ibid. — ⁵ 1^a 2^{ae}, q. III, a. 2 c.

⁶ In lib. IV Sent. loc. cit.

verum est, si intelligatur de proportione, quae attenditur in convenientia ordinis¹. Si autem intelligatur de proportione, quae est in commensuratione quantitatis, veritatem non habet, pro eo quod si aqua maris infinita esset, adhuc posset spongia immergi, sicut nunc immergetur, et uniri. Et ideo sufficit ad unionem proportio, quae surgit ex convenientia ordinis. Et talis convenientia est inter creaturam rationalem, et Deum, pro eo quod natura rationalis, eo ipso, quod est imago Dei, nata est ordinari ad Ipsum immediate².

Hinc minime repugnat naturam Divinam in mysterio Incarnationis cum humana uniri, etsi nulla sit inter eas proportio secundum commensurationem.

VII. UNITATEM AB EODEM RES DESUMIT, A QUO DESUMIT SUUM ESSE. Siquidem ens et unum convertuntur; quaelibet enim res est una per suam entitatem³. Unde ab eodem res habet, ut una sit, a quo habet, ut sit. Et quoniam quaelibet res per formam habet, quod sit ens⁴, per formam quoque habet, quod sit una.

Hinc Vitalistae refutantur, qui plures animas in uno homine admittunt. Evidem homo unus, quemadmodum reipsa est, dici non posset, si plures in eo essent animae⁵.

VIII. UNIUS POTENTIAE UNUS EST ACTUS⁶.

IX. UNIUS REI UNICA EST DEFINITIO⁷.

X. UNIUSCUIUSQUE REI NATURA EX EIUS OPERATIONE OSTENDITUR⁸.

XI. UNIVERSALE AUT NIHIL EST, AUT POSTERIUS EST. Hoc Aristotelis effatum explicandum est, quatenus universalia, licet habeant fundamentum in rebus, tamen actu non existunt, nisi in intellectu, qui vim suam super singularia exercens, notiones universales sibi comparat⁹. Unde universale abstractum a rebus, dicitur esse ipsis posterius¹⁰.

¹ Vid. p. 273. — ² In lib. III Sent., Dist. I, a. I, q. 1 ad arg.

³ Vid. p. 369. — ⁴ Vid. p. 142.

⁵ Vid. p. 34. Cf Sanseverino. *Elementa seu Inst. Phil. Christ.*, vol. III, pars 1, c. III, a. 4 sqq, p. 98 sqq. Neapoli 1874.

⁶ Vid. *Agens unum, in quantum est unum, non producit, nisi unum*, p. 42.

⁷ *Definitiones sunt diversae, si res sint diversae*, p. 101.

⁸ Vid. *Modus operandi sequitur modum essendi*, p. 214.

⁹ Vid. s. Thom., passim.

¹⁰ In lib. II Sent., Dist. III, q. III, a. 2 ad 1.

« Universale . . . habet relationem unius rationis ad omnia inferiora, in quibus est per unam rationem; eo quod ipsum in actu et intellectu uno modo est in omnibus, et hoc modo in intellectu est secundum hoc esse; et nihil est in inferioribus in natura secundum hoc esse; sed est posteriorius eis, quia non est in eis, nisi quia per intellectum uno modo est in omnibus abstractum¹ ». Illud tamen monere est cum eodem Aquinate, quod nempe, « si sit aliquis intellectus a rebus cognitionem non accipiens, universale ab eo cognitum non erit abstractum a rebus, sed quodammodo ante res praexistens, vel secundum ordinem causae, sicut universales rerum rationes sunt in verbo Dei; vel saltem ordine naturae, sicut universales rerum rationes sunt in intellectu Angelico² ».

XII. UNIVERSALE EST PER SE INCORRUPTIBILE³.

XIII. UNIVERSALE EST SEMPER ET UBIQUE. Potest aliquid dici esse semper, et ubique, vel quia eius natura expostulat, ut in omni tempore, et loco sit; vel quia eius natura non expostulat, ut in aliquo certo tempore, aut in aliquo certo loco sit, sed ad quodlibet tempus, et ad quemlibet locum indifferens sit. Iam hoc altero sensu dicitur universale esse *semper*, et *ubique*: « Dicendum, quod aliquid esse semper, et ubique, potest intelligi dupliciter. Uno modo, quia habet in se, unde se extendat ad omne tempus, et ad omnem locum; sicut Deo competit esse ubique et semper. Alio modo, quia non habet in se, quo determinetur ad aliquem locum, vel tempus. . . Et per hunc modum quodlibet universale dicitur esse ubique, et semper; in quantum universalia abstracthantur ab hic et nunc. Sed ex hoc non sequitur ea esse aeterna, nisi in intellectu, si quis sit aeternus⁴ ». Hinc, universale « est semper in Intellectu Divino⁵ ». Insuper universale « est semper, quia est quoniamcumque est suum singulare; sicut etiam dicitur esse ubique, quia est ubicumque est suum singulare⁶ ». Quo-

¹ Alb. M., *Post.*, lib. I, tract. V, c. 3.

² I, q. LV, a. 3 ad 1. Vid. p. 373.

³ Vid. *per se — Per accidens*, p. 253.

⁴ I, q. XVI, a. 7 ad 2.

⁵ Qq. *dispp.*, *De Pot.*, q. V, a. 9 ad 16.

⁶ *Ibid.* Vid. Alb. M., *loc. cit.* c. 7.

niam vero singularia sunt diversa, *universale est ubique, sed non secundum idem esse*¹; ita ut, quemadmodum subdit s. Bonaventura, « quamvis sit in omnibus singularibus, tamen secundum aliud, et aliud suppositum, et ita numeratum² ». Atque, « cum multa loca sint, ubi sua singularia non sunt, nec ibi est universale³ ».

XIV. UNIVERSALITER REM COGNOSCERE EST PERFECTIUS COGNOSCERE. Istud effatum, secundum s. Thomam, hanc habet sententiam: « Cognoscere aliquid in universalis dicitur dupliciter: Uno modo ex parte rei cognitae, ut scilicet cognoscatur universalis natura rei. Et sic cognoscere aliquid in universalis est imperfectius; imperfecte enim cognosceret hominem, qui cognosceret de eo solum, quod est animal. Alio modo ex parte medii cognoscendi. Et sic perfectius est cognoscere aliquid in universalis; perfectior enim est intellectus, qui per unum universale medium potest singula propria cognoscere, quam qui non potest⁴ ».

XV. UNO ABSURDO DATO, SEQUITUR ALTERUM. Quod solet hunc in modum explicari: Modica transgressio principio a veritate discedentibus in fine fit longe decies millies maior. Exemplum esto de iter agente, qui errat in principio itineris; et ideo quo magis pergit, eo magis in errore perseverat. Sic primus error in principiis fit maximus in fine. Hinc s. Thomas: « Ille gravissime ignorat, et periculissime errat, qui errat circa principia⁵ ». Et alibi: « In quolibet genere pessima est principii corruptio, ex quo alia dependent⁶ ».

XVI. UNIUS TANTUM EST UNUM PROPRIMUM. Evidens est hoc effato non illud significari, in qualibet re unam tantum esse proprietatem: sed potius unum non posse esse stricte proprium duorum specie et natura differentium. Nemo enim *proprium* appellat id, quod potest aliis inesse⁷. Sane, *proprium* essentiam speciei necessario consequitur⁸; atqui essentia non nisi uni tantum speciei convenire potest,

¹ I, q. VIII, a. 4 ad 1.

² In lib. I *Sent.*, Dist. XXXVII, a. II, q. 1 *resol.*

³ S. Thom., *De Pot.*, loc. cit.

⁴ I, q. LV, a. 3 ad 2.

⁵ Qq. *dispp. de Malo*, q. III, a. 13 o.

⁶ 2^a 2^{ae}, q. CLIV, a. 12 c.

⁷ Vid. p. 276.—⁸ Vid. p. 8.

quia est illud, quo una species ab alia differt; ergo proprium non nisi uni tantum speciei convenire potest.

XVII. UNUMQUODQUE AGIT, SECUNDUM QUOD EST ACTU¹.

XVIII. UNUMQUODQUE COGNOSCIBILE EST, SECUNDUM QUOD EST IN ACTU².

XIX. UNUMQUODQUE, DUM EST, NECESSARIO EST. Sermo hic est de necessitate *hypothetica*³. Si enim ponatur aliquid esse, necesse est, ut sit, alioquin idem simul esse, et non esse posset.

XX. UNUMQUODQUE EST PROPTER SUAM OPERATIONEM⁴.

XXI. UNUMQUODQUE IMPERFECTUM CAUSATUR A PERFECTIONE⁵.

XXII. UNUMQUODQUE NATURALITER SUO MODO ESSE DESIDERAT⁶. Ex hoc effato s. Thomas egregie infert substantiae incorruptibilitatem. Eo enim posito, sic arguit: « Desiderium in rebus cognoscitibus sequitur cognitionem. Sensus autem non cognoscit esse, nisi sub hic et nunc; sed intellectus apprehendit esse absolute, et secundum omne tempus. Unde omne habens intellectum naturaliter desiderat esse semper. Naturale autem desiderium non potest esse inane. Omnis igitur intellectualis substantia est incorruptibilis⁷ ».

XXIII. UNUMQUODQUE TANTUM HABET DE BONO, QUANTUM HABET DE ESSE. Veritas huius effati profluit ex eo, quod bonum et ens convertuntur⁸.

V

DISTINCTIONES

I. VERITAS IN ESSENDO—IN COGNOSCENDO—IN SIGNIFICANDO. *Veritas in essendo* est convenientia rei cum intellectu a quo, tamquam a causa, ipsa res pendet. Hoc sensu res naturales dicuntur *verae*, quatenus convenientur intellectui

¹ Vid. p. 40.

² Vid. *Nihil cognoscitur, nisi secundum quod est in actu*, p. 233.

³ Vid. p. 3-4.

⁴ Vid. *Ultima perfectio rei est eius operatio*, p. 377.

⁵ Vid. *Perfectum est prius imperfecto*, p. 278.

⁶ Vid. p. 53.—⁷ I, q. LXXV, a. 6 c.—⁸ Vid. p. 43.